



Tir Yimym

www.tirymym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

Israel-i asendenshir Gaza
amak; nisung 38 tepset

Chelsea-i Joao Pedro atema £60m
agütsütsü mulunga agizükogo



VOL. XXII ISSUE NO. 257 (ADOK 257)

DIMAPUR

SANGTENNÜ (TUESDAY)

CHITENI (JULY) 01, 2025

₹ 5.00

5 Tribes CORRP ajanga state sorkar dang Reservation Policy atema lepshir

Dimapur, Aami/June 30

(TYO): State nung tang aliba Reservation Policy reprangshitsü asoshi Commission ka tentettsü State Cabinet-i telemtetba agia liaka State sorkari maneni mapa meinyakba atema 5 Tribes CORRP ajanga temulung masüba lemsatepa liasü.

Commission ka tentettsü sangdongba pelashishia agizük, saka State sorkari tang tashi tongtipang takhangba ana - tang aliba Reservation Policy agientsü mesüra kin pongu nem unreserved quota lemozütsütsü - agüja aliba nung telangzüba magütsür, ta parnoki ashi.

June 3, 2025 nü senden amendang onoki State sorkar dang iba ken o tongtipang ana nung telemtetba tajung agitsü jangja-jangja shiogo. Ajisüaka iba onük nung terenlokba balaka aliba majiteter mesüra sorkar nungi osang agütsüba mali, ta 5

Tribes CORRP ajanga ashi.

Iba Commission nungta züngsem ama civil society organizations (CSOs) malitsüla, ta Committee ajangasa maneni jangjatsü.

Commission mapa nung indang-indanga aser ochishia inyaksü aser 'conflict of interest' mesüra danga teka mesangshidaksütsü mechi ibai tongtipang lir, ta parnoki ashi.

Anungji 5 Tribes CORRP ajanga State sorkar dang mapang talangka nungi tebilemtsü khuret lemsatepa aliba ochi nung bentettsü aser tasü ita inyaksü ajungshir.

Arok ajungtsü asoshi Committee-i amalitep akatsü temulungtetba aser tangatetba nung lir, saka mapang tetemsü ka nung iba ken o mebeneteti yutsüra democratic yimya nung tapet mera agitsü, ta 5 Tribe CORRP ajangasa ashi.

Tetsür chanu ka dak züka merenshiba CMA-i aitsür

Dimapur, Aami/June 30

(TYO): Pfutsero Town kübok Rukizu Colony nung arishi küm 11 tanur ka dak la tetsü ama la mesür Thukungolu Hesu, W/o Vezovoyi Hesu ajanga shiruru ama tazü mapa inyakba khukhua aitsür, ta Chakhesang Mothers' Association (CMA) sangdong ka nung ashi.

Lai teti tanutsüla dak kanga züka merenshia liasü aser iba ama mapa tamajung inyakba dangar nem metetdaksüra timtem tulu alitsü ta amokmereba ajanga mapang talangka iba timtem temai madoki liasü, ta ashi.

Iba timtem ya June 28, 2025 nikongdang danga timtem kar asoshi pharmacy kati anir aoba mapang temai adoka liasü. Iba mapang la temang nung tarak aser yiruba zübu ngutet, koba

ajanga tanutsüla dak kanga züka merenshiba jangja sayu, ta CMA ajanga ashi.

Tetsü kati iba ama temenen mapa inyakba ajanga tanur ka temang shi aser tanüla nunga timtem agüja tetsütem ajunga maksüdakja temulung yirutsür. Nisung shingaiia temeim mesayudang tetsü kati anepalua meimtsüla, saka iba ama temenen mapa ya shisadangtsü makok aser tesüngmangtsüka lir, ta ashi.

Ozüng amshirtem dang tekeratiba nung aibelener nem tapet temerenshi agütsütsü akhanger. CMA ajanga iba ken o maneni meita aser repranga alitsü aser ochi obendang magütsü tashi tanur anema mapa tamajung inyakba nungi onok jenshia malitsü, ta CMA sangdong ajangasa ashi.

CHC Mangkolemba nung teimla tasen sayur

Dimapur, Aami/June 30 (TYO):

Nüburtem nem healthcare services agütsüba tajungba kumdaksütsü mechi Community Health Centre (CHC), Mangkolemba nung June 27, 2025 nü state-of-the-art surgical laparoscopic set den trolley aser advanced ultrasound machine semüka liasü.

Item oset ya Luyong Tribal Welfare Society ajanga tenla agütsüba alitsü.

Item oset semzükbä sentong nung Advisor, Transport & Technical Education, Temjenmenba den healthcare ketdangsür, nüburtem aser ADC Mangkolemba, Moakumzuk Tzudir dena liasü.

Iba sentong nung Advisor

Temjenmenba-i o tatsüka jembidang, nüburtem indang healthcare ki o jen aser osetsüset tajungba kuma renlokdaaksütsü asoshi sorkar ketdangsür aser nüburtem aser lokti tentet balala lungjemer inyaksü kanga tongtipang lir ta ashi.

Item oset amenokba ajanga CHC Mangkolemba nung tashidak balala putetba aser anepaluba tsütsü terenlok kanga alitsü imlar, koba ajanga shirangertem tajungba nung anepalutsü aser nüburtem ajangzüksü.

Iba inyakyim ya sub-division nung healthcare sector asoshi tongtipang mera ka lir aser medical services tajungba kumdaksütsü tangatetba nung inyakba sayur.

Minister Jacob Zhimomi-i NCDC maneni yaritsü ayongzük



State/UTS ajunga indang Cooperation Ministers tem National Conference ka Bharat Mandapam, New Delhi nung June 30, 2025 nü alidang tangokba noksa ka nung Minister, Public Health Engineering and Cooperation, N Jacob Zhimomi angur.

Dimapur, Aami/June 30

(TYO): Union Minister of Home Affairs and Cooperation, Amit Shah mendenpuba sür Bharat Mandapam, New Delhi nung June 30, 2025 nü National Conference aliba nung Minister, Public Health Engineering and Cooperation, Government of Nagaland, N. Jacob Zhimomi dena liasü.

Iba mungdang nungya States/UTs ajunga indang Cooperation Minister tem aden.

Mungdang nung Minister Zhimomi-ia Cooperation Ministry ajanga tongtipang mapa inyakba, talisa cooperative society tem tajungba nung ketdangsütsü asoshi National Cooperative Database yangluba asoshi tenüngsang agütsü. Iba ya ajanga State sorkari mapa meinyakba cooperatives tem agienba nung kanga yariogo, ta pai ashi.

Linük tesem balala nung ama masü, Northeast nung cooperatives tem ketdangsüba aser senotsü tsütsü tashi maitba aser business inyakyim balala asoshi sorkari yariba, talisa NCDC funding nung metaloker alir, ta Minister Zhimomi-i ashi.

Pai Government of India dang maneni Integrated Cooperative Development Project amala National Cooperative Development Corporation (NCDC) sponsored projects tem nem senotsü teyari agütsütsü ayongzük, koba Northeast nung aluyimer temi kanga jangja meteta lir, ta ashi.

Primary Agricultural Credit Societies (PACS) ketdangsür aser secretaries temi digitization process junga mangatetba aser mamshitetba ajanga PACS computerize mesüteter, anungji PACS shia nung tajemba agi küm asem atema Data Entry

Operators tem yoktsüla aser yamaji inyakba ajanga PACS nung internal capacity yangera pei sasa operators shimtettsü, ta Minister Zhimomi-i ashi.

Maneni Minister-isa PACS ajanga Jan Aushadhi Kendra, Common Service Centres aser

Pradhan Mantri Kisan Samridhi Kendra nung timtem ajuruba indang tebilemtsü lemsatepa liasü.

Iba sentong temer Minister Jacob Zhimomi-i 'Ek Ped Maa Ke Naam' campaign nung shilem ka ama Nagaland Guest House, R. K. Puram New Delhi nung süngdong kar tema liasü.

Iba mungdang nung adentsü atema Minister meina Cooperation Secretary, Orenthung Lotha, Joint Resident Commissioner, Nagaland House New Delhi, Sharon Longchari aser Nagaland House, New Delhi staff tem oa dena liasü.

Manipur nung KNO/KNA tanishir katetsü, tensa tamajungba akumtsü akok



Imphal, Aami/June 30 (Agencies):

Hombor nikongdang Manipur nung Churachandpur district kübok Mongjang yimtsüng anasa mejangjaba nisungtemi mita atar Kuki National Organisation (KNO) lenir ka densema nisung pezü tepset, ta police temi ashir.

Asürtem rongnung Thangboi Haokip, alias Thahpi dena lir, shiba KNO indang Deputy Commander-in-Chief inyaka liasü. KNO ya Kuli National Army(KNA) indang political wing lir.

Pa ya gari temesüng ka nung dangar ana den külemi oa aliba mapang nok-nü peria bena alirtemi Jesami Road nung nikongdang 3:00 ako meta mita atar amak. Iba lendong atalokba tesem ya Churachandpur jila nungi kilometre ter shi pilar lir, ta police ajanga ashi.

Ketdangsür temi ashiba agi, lendong agütsür yagi anasa nungi injang aika khaloktsü. Gari nung mena alir nisung asemprong tekolak nung khashi. Kuki-Zo tribal tsür ka anasa senzüa aliba dak injang kar agi khashia la

mozüki nung anir oa anepaluba mapang asü.

Lendong ataloker mapang tatsüka tsünga police tem iba tesem tonga aru aser bullet casings tazüng kar nguteta liasü.

Asürtem temang ya post-mortem asoshi Churachandpur District Hospital mortuary nung bener oa lir.

Iba tatalokba nung ajemdaker ken o ka benokogo aser lendong atalokba tesem nungi forensic kuli tem bendena bushisüngdangtsü asoshi agütsüogo, ta osang ajanga ashi.

India sorkar den tang Suspension of Operations (SoO) agreement kübok aliba Kuki-Zo telungpur telok 25 nungi KNO/KNA ya ka lir. Ajungbena par tanishir ka yamai azüdokshia tepsetba ajanga mapang talangka nungi tensa mejungi aliba state, Manipur nung ano tensa tamajungba akumtsü amai ajiteter.

Watsu Telen Kohima lokti senden liogo



Molu Ki Kohima nung June 28, 2025 nü Watsu Telen Kohima lokti senden amendang taongokba noksa ka nung tongti o jembir Principal, State College of Teacher Education, Kohima, Dr. Elizabeth Walling, Kohima Aor Telongjem tir T. Chubayanger aser WTK nungi ketdangsürtem angur.

Dimapur, Aami/June 30 (TYO): Watsu Telen Kohima (WTK) lokti senden June 28, 2025 nü Molu Ki Kohima nung 'TekumkumTetsur' omen nung ajemdaker menogo.

Tongti o jembir Principal, State College of Teacher Education, Kohima, Dr. Elizabeth Walling-i omen nung ajemdaker jembidang, 'Tekumkum Tetsur' ya tetsür kati dangar dang tama nungloksüba mapa azümesena melie mesüra dangar dak metaloka melie tasü ita inyakba dang ajar ta ashi.

Iba amala tetsür ya dangar dak nungi alakteta lir aser pei mapa nung kanga tetangshi, mapa balala tasü ita inyaker, yimya tajung alir, temulung teladak, nükla tajung ayur aser mapa tasen mela-mela angateta inyakteter, tangatetba tajung alir aser metongshitsüba agizükteter, ta lai ashi.

Parnoki telemtetba tajung agir, tesendaktep tajung ayur, dangar dak metaloka malir aser pei nüngdakba meteta mapang shidak amshiteter, ochi asoshi tasü ita nokdaker, ta ashi.

Pei saka temulung ilaa bilemba ajanga mapa nung tamakok ajurur, tekolok mainer, aser shisabulu khuret agi neniter alir, anungji pei nem agütsüba sempet tajung amshia mapa tajung inyaksüla, ta lai ayongzük.

Pei dak aketba sempet tem arok asoshi dangar den yaritepa amshira, ibaji ajanga lokti tajungba kumdaktsür, ta ashi.

Lai tanü tendak nung

suicidal cases, kinungbor den mangatettep adokba ajanga kidang kibong nung azü dokshiba, LGBTQIA, kibong sentsü rongi aiba, lokti nung tebilemtsü balala ajuruba indang lemsatep aser kidang pei kinungbo aser chirnurtem den tajunglen nungi jembishinüa aser inyaksangshira aser pei chirnurtem lokti nung intetdaksüra, kibong tekülem agia pei bilemba kibok nung lemsatepra, item tebilemtsü malitsü, ta Dr. Walling-i ashi.

Tetsür ka dak item sempet ji lira, la dang 'Tekumkum Tetsur' ta ajatsü akok, ta lai ashi.

Kohima Aor Telongjem tir T. Chubayanger-i iba sentong nung jembidang, Moluki nung Watsu Telen Kohima office amenokba atema pelaba lemsatep aser ibaji ajanga Kohima Aor Telongjem aser Watsu Telen Kohima tsüngta telungjem aliba sayur ta ashi.

Union ka tejakleni aotsü asoshi mapang kanga agir, anungji arsanga telemtetba magitsü saka atasaa alitsü, nükjidadong nung rangloksü aser aseni mera agiba ajanga tejakleni aor maor metettsüla, ta pai ashi.

Advisory Board, WTK nung züngsem Atula Wai-i 'Ku Maitsü' onük nung jembidang, nisung ajak balaka sotet aser aseni dangar den memedemangtsüla saka asen kechi, aji agizüka asen nükjidadong atongtsü asoshi meranga inyaksüla, ta ashi.

Alemli otsüla-oboula nunger mapang ochishia aliba, mapa

meranga inyakba, dangar dang akumtsübobba yimyatam asenoki tarutsü putu nema angazükdaktsütsüla, aser tanü technology renloka aoba ajanga talisa tanurtemi tsürabur aser teti-teyi nunger dang asüngdangtsü melen Artificial Intelligence dang metaloka alir, ta lai ashi.

Iba nung tai ya tsürabor dak keta lir, anungji asen sobaliba aser maitsü wazüka ayutsü asoshi süoki ia bilemtsüla, ta lai ashi.

Sentong nung WTK tir menden yutsüla S. Nukshirenla-i Watsu Telen Kohima indang otsü aser inyakyim kar lemsatepa liasü.

Laisa WTK tir ka ama lai inyaka arudang ajangshibatam lemsatep aser unit aser züngsemtem dang pelaba lemsatep.

Senden nung Permanent Source of Income Committee aser Trust Fund indang osangtem agia liasü.

Sentong WTK mendenpuri anir agi aser WTK tatong tir menden yutsüla Ayula Longchar-i melepzüng o jembia liasü.

Waromungtsur Telongjem Kohima ajanga temeja ken ka aten aser WTK züngsem alima nungi bilar alirtem asoshia sarasadem mapang ka agia liasü.

2025-2028 kümsük asoshi Watsu Telen Kohima tir Bendangsangla, tatong tir Alemla Mary, tongti zülur Akangnungla, repsem zülur C. Narola Jamir, senotsü zülur Tenlamongla aser senotsü zülur teyarir Chubasenla shim.

DIPR nung Line Array Deployment & Digital Deployment training tenzükogo

Dimapur, Aami/June 30 (TYO): Directorate of Information and Public Relations, Kohima nung Introduction to Line Array Deployment and Digital Console application training anogo ana atema June 30, 2025 nü tenzükogo.

Mezüng metetpelaba sentong nung Director, IPR, Dzüvinuo Theünuo-i angazükba ya kodanga tatem maka ta ashi aser department indang osettsüset tajungba kuma upgrade asütsü aser itemji training agirtemi ketdang asütsü ta ashi.

Lai training nung adener ajunga dang saksalema langka tasen angazüktsü maongka agitsü ajungshia liasü.

Department koba nung südir süaka training junga agir aser meteter aliba employees ya department takok asoshi tongtipang lir ta lai ashi aser iba training nükjidadong aser imlaba indanga lemsatepa liasü.

Laisa parnok dang training session mapang mongintem nungi akok tashi inyakyim balala angazüktsü ayongzük aser shisalen agütsür dang pelaba lemsatepa liasü.

Shisalen agütsür Audio Engineer and Proprietor, Audio

Garage, Atsunglir Jamir-i o tatsüka jembidang, training sentong nung department aser training agirtemi maneni amalitep akaba atema pelaba lemsatepa liasü.

Audio development lima ka nung technical tsütsü terenlok jenti lir, anungji iba training nung shilem agirtemi Audiography nung tongtipang inyakyim angazüktsü imlar, ta pai ashi.

Paisa training agirtem dang sound aser audio correction dak sendakba mangatetba lemsateptsü aser yimya balala tajungba nung angazüktsü ayongzüka liasü.

Training ya Line-Array nung rangloker lir aser ibai speaker units balala aliba speaker system indang lir, kong yimya kasa aliba speaker units tem 'linear acoustical source' adokdaksütsü asoshi anepalua ayutsü aser Digital Console Application ya text-based interface amshiba indang lir ta rateta ashi.

Digital mixing consoles ya timba recording studios, public address systems, sound reinforcement systems, broadcasting, television, aser film post-production atema amshir.

FOCUS Nagaland-i department balala den MoU zülutep

Dimapur, Aami/June 30 (TYO): Fostering Climate Resilient Upland Framing System in the Northeast (FOCUS) Nagaland kübok ki o jen agütsüba aser Memorandum of Agreement (MoA) zülutepba sentong ka Chief Secretary & Chairman PSC, FOCUS- Nagaland, Dr. J. Alam, IAS menden sür CS's Conference Hall, Nagaland Civil Secretariat, Kohima nung June 30, 2025 nü agiogo.

APC& MD FOCUS- Nagaland, Wezope Kenye, IAS ajanga iba sentong nung jembidang, ibai project küm trok inyaka arur tembangba anogo lir, ta ashi aser sendaktepa aliba departments nem ki o jen agütsüba ya sustainability asoshi mera ka lir ta ashi.

Tenzüka aotsü asoshi tamendak dak yangluogo aser tang iba project tejakleni bener aotsü department tem dak keta lir, ta pai ashi.

Paisa sendaktepa aliba department tem dang maneni Nagaland nung aluyimer temi nüngdakba ajiteta yariteptsü ayongzüka liasü.

Chief Secretary, Dr J Alam ajanga jembidang, independent third party assessment aser ketdangsür temi ashiba nungi FOCUS projects yagi Nagaland nung danga projects aika inyakba dang nungi tajungba inyaktetba sayur, ta

ashi. Dr Alam-i department balala dang resources tajungtiba nung anepalua amshitsü aser nübur ajangzüktsü asoshi ulushitsü ayongzüka liasü.

Project asoshi shisalen sayur aser shisa agütsürtem ya tongtipangtiba lir, anungji department temi item rongsen jangjateta tarutsü nunga tajungba nung project tem inyaksü nüngdaker, ta CS Dr Alam-isa ashi.

Paisa partnered departments tem dang iba project nung shilem agiba asoshia pelaba lemsatepa liasü.

Iba sentong tetenzüklen FOCUS-Nagaland kübok ki o jen agütsüba aser MoA zülutepba ya Department of Fisheries & Aquatic Resources, Department of Animal Husbandry & Veterinary Services, Department of Cooperation aser Department of Agriculture tem den agia liasü.

Iba MoA zülutepba ajanga line departments temi item projects tarutsü nung anepalua amshitsü khuret aser mapa ajak agizüker. Iba tezüngzüktep ya June 30, 2025 nungi tenzüktsü FOCUS-Nagaland project amoktsüba sülen department temi inyaksü imlaba indang PowerPoint presentation ka Manager, Gender & C.I, Hraveine David-i agüja liasü.



EAC Meluri, Pipfusa Pojar den department balala nungi ketdangsürtem Village Council Hall, Meluri nung June 30, 2025 nü National Awareness and Benefit Saturation Camp of Dharti Aaba Janbhagidari Abhiyan alidang tangokba noksa ka yangi angur.



Kolkata, June 30, 2025: Kolkata nung aliba Law College nung azünger tetsür ka tashiyim amshia raksatsüba anema Junior lawyers aser law students-i longkak aيتدang tangokba noksa nung angur.

Telangana nung factory ka nung reactor apokba lendong nung nisung 12 asü

New Delhi, Aami/June 30 (Agencies): Hombarnep Telangana kübok Sangareddy District nung aliba chemical factory ka nung reactor apokba lendong nung nisung 12 asü aser nisung 34 yiruogo, ta ketdangsertemi metetdaksü. Pashamylaram industrial area nung aliba Sigachi Chemicals Industry nung mapa inyaktertem aika lia iba lendongji atalok, aser tang tashi nisung aika building telung nungjagi madokteti lir, ta Sangareddy police-i metetdaksü.

"Tang tashi nung kümzüka

alirtem rongnung karbo kanga mejungi yirua lir. Tang tashi nungbo building telung nungji nisung kwi aliar mejangja," ta police-i metetdaksü. Iba lendong atalokba sülen mi enseptsü aser kümzükba maparen inyaksü atema fire tenders 11 den sepai aika yoka liasü.

Tang tashi nungbo Congress sorkari official sangdong kecha magütsü, ajisüaka Telangana assembly nung Opposition lenir aser BRS Tir, KT Rama Rao-ibo X ajanga tekeraba nung mapa

inyaktertemji kümzüksü mepishia metetdaksü. "Patancheru kübok Pasamailaram Industrial Area nung reactor apokba lendong osang angashia jashir. Ni ketdangsertem dang tangsa mapa inyaktertemji kümzüksü aser yirua alirtem nem medical teyari tajungtiba agüjang ta mepishir," ta pai metetdaksü. Paise iba lendong ataloktsüsa aibelenertem nem temerenshi agütsütsüla, aser tarutsü nungbo item ama lendong mataloktsüsa inyaksüla, ta metetdaksü.

State tem dang census atema administrative units renemtsü tuyu

New Delhi, Aami/June 30 (Agencies): Centre sorkari states aser Union Territories (UT) ajak dang taküm December 31 anogo tashi nungbo administrative jurisdiction melenshitsü lira melenshiang, kechiyong iba nungji ajemdaker sangkümApril 1 nungi census exercise tenzüksü, ta metetdaksü.

Registrar General & Census Commissioner of India, Mritunjay Kumar Narayan-i shidi ajanga states aser UTs ajak dang, census agitsü atema yimtsüng aser jila ajakji 'uniform enumeration blocks' balala küma lemsatsü aser block shia nungji nütsüng züngdangba mapang aibelen kecha mesüi inyaksü atema enumerator nem mapa nungoktsütsü, ta metetdaksü.

Administrative units melenshitsü lira item ajakji tatem küma latetba sülen ita asem lir ang census tenzüksü, ta state aser UTs nem metetdaksü.

Narayan-i, "SangkümApril 1 nungi House listing Operation agitsü, supervisors aser enumerators shimtsü aser parnok tsüngda mapa lemsatsütsü; iba sülen 2027 küm February 1 nungi nütsüng

züngdangba maparen tenzüksü," ta metetdaksü.

Ketdangsertemi ashiba agi, chief secretaries kübok state tem nung Census Coordination Committees (CCCs) tentettsü.

Committee nung züngsemtemji revenue, local administration, municipal corporations, rural development aser planning education nungi asütsü.

Administrative units boundaries latettsü atema tatembangbuba anogoji December 31, 2025 anogo asütsü. Census exercise ji sangkümApril 1 nungi tenzüka Houselisting Operations (HLOs) agitsü.

Tanabuba shilemji February 1, 2027 nü tenzüksü aser iba mapang nungji nütsüng, loktiliba-rongsenkettzüng aser sobaliba osangtem bendentsü.

1951 küm mezüing census agiba mapang nungi Scheduled Castes (SCs) aser Scheduled Tribes (STs) nisungtem nütsüng osang bendena liasü. 1961 küm nungibo Other Backward Communities (OBC) nisungtem nütsüng balaka züngdangtsü atema Centre sorkari state tem nem temelaba agüja liasü.

India anema Pak, China aser Bangladesh-i Bloc tasen ka tenzüksü

New Delhi, Aami/June 30 (Agencies): Pakistan, China aser Bangladesh linüktemi South Asian Association for Regional Cooperation (SAARC) melen regional group tasen ka tenzüksü atema inyaksangshi tenzükogo, ta osang ka ajanga metetdaksü.

Pakistan aser China nati bloc tasen ka tenzüksü atema maparen tenzükogo, aser June 19 nü China kübok Kunming nung ayongzükb senden nungbo Bangladesh nungi lenirtemia shilem agia liasü, ta osang angazüker.

Kunming nung ayongzükb sendenji taoba mapang SAARC nung züngsem linüktem aika

South Asia group tasenba nungji adentsü atema ajungshitsü nükjidong nung ayongzükb.

Taküm May ita nunga China, Pakistan aser Afghanistan linüktem nungi lenirtem senden ka mena liasü, aser iba mapang nungji lenirtemi China-Pakistan Economic Corridor (CPEC) tuluba akümtsü aser Afghanistan nung Taliban-i aniba sorkar den taliba amalitepa alitsü atema jembia liasü.

SAARC ya 1985 küm December 8 nü Bangladesh yimtiba, Dhaka nung tenteta liasü. Iba telok nung züngsem linük tenet liasü aser 2007 küm nungbo Afghanistan-a aden. Ajisüaka 2016 küm nungi SAARC senden junga mamener.

2020 küm online ajanga agiba SAARC senden nung Ato kilonser, Narendra Modi-i COVID-19 Emergency Fund tenzüksü atema benoka liasü aser iba mapang nungji India-i dollar sen million 10 nangzüka liasü.

19buba SAARC senden 2016 küm Pakistan nung ayongzüka liasü, ajisüaka Pakistan nungi kirakongrartemi Uri nung India nunger sepai 17 tepsetba ajanga India-i iba senden nung madentsü lemtet. Afghanistan, Bangladesh aser Bhutan linüktemia kiralongra aser regional nung tensa majungba ajanga iba senden nung madentsü lemtet. Item kuli ajanga Pakistan nung ayongzükb sendenji thinena liasü.

Ajioda 2016 küm nungi SAARC ya tasüa masü aser taküma masü amai lia China aser Pakistan nati ayonga grouping tasen ka tenzüksü inyaksangshir.

GOVERNMENT OF NAGALAND

STATE COUNCIL OF EDUCATIONAL RESEARCH AND TRAINING

NAGALAND: KOHIMA

No. SCERT/DIET/ADVT-2/2024: Dated Kohima the 30th June 2025

NOTICE

In pursuance of the Department's Advertisement No. SCERT/DIET/ADVT-2/2024 dated, Kohima the 29th May 2025, on the recommendation of Departmental Recruitment Board (DRB) and basing on the marks obtained in the interview, the under mentioned candidate is recommended for appointment to the post of MTS (Grade-IV) under DIET, SCERT for the District of Tuensang.

Sl No.	Name of the Candidate	Roll No.	Remarks
1	Shri M. Chemose Sangtam	DMTS107	Selected
2	Shri A. Nungsang Chang	DMTS101	Waiting list

The selected candidate is directed to submit his acceptance letter to the office of the undersigned within 7 (seven) days with effect from the date of this notification. Failing to submit the same shall be treated as non-acceptance and the said post shall be allotted to the candidate in the waiting list.

(KEVIRALEÜ KERHUO)
Director
SCERT, Nagaland, Kohima

ਪੰਜਾਬ ਨੈਸ਼ਨਲ ਬੈਂਕ

punjab national bank

Circle Sastra: Imphal

Kwakethel Thokchom Leikai

E mail: cs946700@pnb.co.in

SALE NOTICE FOR SALE OF IMMOVABLE PROPERTIES

E-Auction Sale Notice for Sale of Immovable Assets under the Securitization and Reconstruction of Financial Assets and Enforcement of Security Interest Act, 2002 read with provision to Rule 8 (6) of the Security Interest (Enforcement) Rules, 2002. Notice is hereby given to the public in general and in particular to the Borrower (s) and Guarantor (s) that the below described immovable property mortgaged/charged to the Secured Creditor, the constructive/physical/ symbolic possession of which has been taken by the Authorized Officer of the Bank/ Secured Creditor, will be sold on "As is where is", "As is what is", and "Whatever there is" on the date as mentioned in the table herein below, for recovery of its dues due to the Bank/ Secured Creditor from the respective borrower (s) and guarantor (s). The reserve price and the earnest money deposit will be as mentioned in the table below against the respective properties.

SCHEDULE OF THE SECURED ASSETS

Sl. No.	Name of the Branch	Description of the Immovable Properties Mortgaged/ Owner's Name(mortgagors of property/ les)	A) Dt. Of Demand Notice u/s 13(2) of SARFAESI ACT 2002 B)Outstanding Amount as per respective demand notice C)Possession Date u/s 13(4) of SARFESI ACT 2002 D)Nature of Possession Symbolic/Physical	A)Reserve Price (Rs. in Lakhs) B)EMD (last date of deposit of EMD) C)Bid Increase Amount	Date/ Time of E- Auction	Details of the encumbrances known to the secured creditors
1	Dimapur (045120)	All the part and parcel of Landed property measuring 7189 Sq Ft covered by Patta No.3275 under Regd No.15/A dated 18.05.2011 situated at Diphupar Village "A"- Khel,Dimapur,Nagaland ,which is butted and bounded by at North:Plot of Vilhou Sao. South:Plot of Yekhuvi, East:By the approach road ,at West:Plot of Ketsutso Angami	A) 19.03.2018 B) Rs 7,75,291/- + further interest C) 30.08.2019 D) Symbolic	A) Rs. 59.62 Lakhs B) Rs. 5.96 Lakhs 30.07.2025(Upto 12.00 PM) C) Rs. 0.20 Lakhs	30.07.2025 From 01:00 PM to 04:00 PM	NIL

TERMS & CONDITIONS

The Sale shall be subject to the Terms & Conditions prescribed in the Security Interest (Enforcement) Rules 2002 and to the following further conditions:

1. The properties are being sold on 'AS IS WHERE IS BASIS' and 'AS IS WHAT IS BASIS' and 'WHATEVER THERE IS BASIS'

2. The particulars of Secured Assets specified in the Schedule hereinabove have been stated to the best of the information of the Authorized Officer, but the Authorized Officer shall not be answerable for any error, misstatement or omission in this proclamation.

3. The Sale will be done by the undersigned through e-auction platform provided at the Website <https://baanknet.com> on 30.07.2025 from 01:00 AM to 04:00 PM.

4. For detailed term and conditions of the sale, please refer <https://baanknet.com>

Place: Imphal

Date: 25.06.2025

Authorized Officer

Punjab National Bank

Secured Creditor

STATUTORY SALE NOTICE UNDER RULE 8(6) OF THE SARFAESI ACT, 2002



TIR YIMYIM YIMOBILEM (EDITORIAL)

DIMAPUR TUESDAY, JULY (CHITENI) 01, 2025

Mapai mao ita sen agir

Nagaland nung mapai mao ita sen anguba osang yabo tasen ka masü, saka Kohima nungi tenzüker district ajak nung government office-tem nung inyaktertem anogo shia mapang shitak-shitak nung mapai odagi ta angashi nung dang asenok ajak asoshi osang tasen aser tajung ka asütsü. Tawa Kohima nung Deputy Chief minister Y.Patton-i anir parnok mapa inyakdak Civil Secretariat nung mapa inyaktertem mapai arur aser marurtem mita oa repringba mapang nisung aika mapai maruba puteta temerenshi agütsür südi. Ajisüaka, anogo shiabo yamaji mapa inyaktertem mapai aru maru mita moutettsü aser parnoka maor, anungji government nung department aser office shia mapa inyaktertem ajak anogo shia mapai arutsübaij pei department aser pei office nung tokolakba dak keta lir. Atangji, government mapa nung ajaki tulus kümner aser tokolak asütsü merangteper, ajisüaka tulus menden nung amenba aser department ka nung mesüra office ka nung tokolak akümbaji ita sen atuba aser maongka tapu balala anguba dang nungi teimba aser tuluba khuret aser mapa lir. Aji oda, anogo shia office nung tokolakba o Chowkidar-ba na tama office atongtsüla aser tesenshidanga tena tesü asütsüla. Ibaji mapa temela masü saka tokolakba aser tulubai anir yamaji mapa inyakba mapang shitak amshia mapa meinyakra, office nung chowkidar-ia mapang shitak nung office melapoktsü aser ki aokertemia anogo shia office takdang aser metsümeshidak okteta merüka yutsütsübaij parnok mapa masü amai küma aotsü. Tanü Nagaland nung department aika pei ki agi office kümer pei kidang nungi dang office mapa inyaker. Iba jagi teinyaktertembo ayongayonger saka nübertembo kanga akoksar. Iba amaji mesüdaktsütsü atema mapang mapang shia tesem balala nung kaketshir telungjemi government office nung mapa inyaktertem aru-maru metettsü atema mita aoba osang angashir. Aji oda, taoba hopta nunga Tuensang nung Chang Kaketshirtemi government office-tem nung mapa inyaktertem shitak ali mali mita aoba mapang, office nung tokolak-temi anir tilatiba tashi nung inyaktertem aika mapai mao ser anogo shia mapai ao ama ita senbo shitak agizüka agiba puteta mepelaba osang metetdaksüba jagi, tanü Tuensang nung dang masü saka Nagaland nung Kohima nung Civil Secretariat aser Directorate office-tem nung inyaktertemi anir district aser division shia nung mapai mao ser ita sen agizüka agir nisung aika lir ta sayur. Ibaji kodang bilemdangdir, mapai mao ita sen agizüka achirtem rongnung nisung aika, ashiko, mapai mounüba agi masü mapa inyaktsü makaba agi maortema alitsü südi. Ibajibo ajak atema takoksa tulu lir, kechiyong mapa teinyaktsü maka ser nisung shimba jagi government sen amajok nung lalur aser ano mapa teinyaktsü maka ser government mapa nung shimsang aser shimlajia pei inyaknütsü meinyaktet ita sen tilaka angati achiba jagi taküm rajang kümdaktsür. Odanga government ita sen chia alirtem ya pei dak aketba tashi, sempet aser tejangraba tesadanga mamshitet, taküm piyong ita sen chia kazür leperi aiertem lir. Iba jagi nisungbaji dang masü saka alima akoksar. Aji oda, sempet akar aser temetetba shisatsü tulu alirtem government mapa inyakba ya sempet tajung aketba nisung ka, akümüli tepiyong, kima yimdongia meyoki kidang-kidang dang chiajema mongdaktsüba amai lir. Atangji, akhidang azüng zülü angazüklibo, government mapa nung ita sen chia alitsübaij dang tematiba jenjang liasü, saka tanü asüngbo government kübok ita sen chia alitsüba masü saka peisasa pei inyaktetba mapa inyaka sademsadema alitsü merangtepba putu lir. Aji oda, temetetba aser shisatsü alirbo, pei meranga inyakba nungi anguba anogo senji tangar ita sen den kasasa amai angur. Kasaji, tanübo government mapa bushitsüba masü saka government den toktepa mapa adokdakja lanurtem yarir. Iba ama tensa ka nung Nagaland government-i mapa inyaktsü maka ser inyaktertem shima alibatem ajak tangutsü tim agütsür mapa nungi anentsütsüla aser tanüngba ishika jagi mapa shitak koka inyaktsüla. Iba jagi dang government-a khuret pongbatsü aser mapa nungi anenertema kecha talenba melii taküm tasen kümshir pei jangraba mapa, ajak asoshi, tajangzük keta inyaktettsü.

OLEMSABANG

Ajongben timtem mapang teyaritsü-yim tetuyuba kar:

~ Dr. N.Meren Imchen, Lower Bayavu Hill

(Yashi adok nungi...)

TSÜRABUR MAPANG NUNGI BENSIA ARUBA TAILA TANGATETBA ASER INYAKBATEM(WRONG CONCEPTS AND PRATICE) KAR:-

- 1. Tepok raksar aodang(diarhoea/loose motion) kecha mechidaktsütsü mesura mejemdaktsütsüla:** Iba ya kanga taila tangatetba, iba yagi shirangsangji temang nungi tsü ajonga oadokba (dehydration) ajanga danga timtem aika eg acute kidney failure, coma etc kümadoktsü. Anungji ibala mapang nung doctor mozü den ORS mesura dal ontsü, boil ontsü mesura tsü talem peria ajemtsüla.
- 2. Measles agi shirangdang mozü mechidaktsütsüla:** Iba ya-a taila tangatetba ka, tanga rural area nung alirtem aikati benshiba angur. Hau, measles atema vaccine dak alaka danga mozü mali, kechiaser iba ya viral tashitak, saka iba nung sentakba (complications) danga timtem mekümdaktsütsü atema doctor-i agütsüba mozüji nungtaker.
- 3. Tepzünu(Boils) atokdang mozü machitsüla:** Iba ya-a taila tangatetba ka lir. Mozü achiba jagi tepzünuji- 1) madoki anenadoktsüa akok,mesura 2) adokaka, tilaba aser tango-tashi tajemba kümdaktsür.
- 4. Temang meta-a (high temperature) shirangdang mi apua su tali abenloktsüba:** Temang temperature kanga tsüka(hyperpyrexia) kümdaktsüba ajanga asentsü jenti yimtoka tekolak aser kidney tashi nung kongshia timtem aika atokdaktsür. Anungji iba ama mapang nung tsü temokong nung su medena tekolak aser temang ajonga asentsü aitokja(cool sponging) temang temperatureji normal kümdaktsütsübaij-ang merangtsüla.
- 5. Tepela(navel) zü atsüpet:** Ajongben tepok tashitsü atudang tepela(navel) tezü atsüpet ta Kobiraj(Quacks) nem tepok nung nemshidaktsür(massage) aser iba ajanga tar tebin aser appendix rupture sua complications balala adokdaktsüba angur. tanürji tetsü nu menden nung ali tashi tepela zü(umbilical cord) ajanga tetsü temang nungi belena chiyunger aser tangu sashir, saka kodang tanürji sozüka tepela züji mejepdangdir item ajak anener, tepelazüjia kongadoker aser tain ama teni tebang ajanga tangu sashir aser chiyunger. Anungji tanür suaka tain suaka tepela zü atsüpettsüsa kecha mali.
- 6. Tenuk aser temang nanya-nanya-a küma shirangdang(Jaundice):** Jaundice-i shirangdang tenarong mesura tepela(navel/umbilicus) nungi jaundice atsüa indokba aser tatem nung menur-ang hospital-isa oa taküm tempangba otsü aika angur. Jaundice-ji chemical ka koba dang bilirubin ta ajar ibajagi atokdaktsür, aser iba chemicalji asen tenuk nung temesung tesem(conjunctiva) aser teküp nung aliba "epithelial cell" temji bushia oa idakji amonger aser iba jagi tenuk aser temang teküpji tenenya (yellow) kümdaktsür. Ibaji tenarong mesura tepela nungi tebang agi mesepteta indoktetsübaij medical science ajangabo meshiteter mesura magizükteter.
- 7. Teret suktangdang mesura lokshishidang(fracture and dislocation):** Ibala mapang nung kobiraj(quacks) bushia oagi sungo to tapu kar mesura totsü tapu kar nua neploktsür bandage sudaktsüba aika angur. Tia akar kar oda pa sasa anebtu aliba aneber, saka tanüngba aika mapang talangka amshia lir tesusa hospital nung teret doctor dangisa arua atemer. Iba ya-a medical science ajanga tim-a ta rasa-a meshiteter mesura metuyur.
- 8. Temang nung sung/lung kari atepdang(Blunt injury):** Ibala mapang nung aikati tsü talem(warm fomentation) mesura totsü o sungmok menungtepa sanger tatsük neploktsür. Saka iba melena ice pack mesura tsü temokong towel nung metena neploktsüba(cool sponging) tajungba asütsü.

Ajongben tensa tamajung balala ajuruba aika rongnungi kar shiema lemsateper, matok-meperiba kar lira tazüngeritemi pei sasa metongshia azüngtsü mepishir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

LA nung Khristanem apuba atema pastor-i ICE agents aitsür



Los Angeles nung ICE agent temi Iran nunger Khristanem apuba mapang tangokba noksa nung angur.

June 30, 2025: Los Angeles, California nung pastor kati, par Arogo nung züngsem Iran nungertem federal agents-i puogo, ta metetdaksü.

Agents-i apuba mapang nung tetsür kabo taoksa nung süchia ao, ta pastor-i ashi.

Tesüiba hopta ka tsüngda Los Angeles nung aliba Arogo nungjagi züngsem pongu apu, aser parnok rongnung apuani den par jala tanur ka densema lir, ta Los Angeles nung aliba Cornerstone Arogo nung pastor, Ara Torosian-i metetdaksü.

Iran nung kanga Khristanem kanga reshikangshiba ajanga Pastor Ara Torosian-i Iran nungi US-i jena oa liasü.

Pa lia agents-i par Arogo nung züngsemtem puer ao.

Ano par Arogo nungsa züngsem apuani nata federal agents-i par kima apuba mapang tetsürla, Marjan süchia ao.

Pastor Torosian-i, "Apuani na apuba mapang nungji tetsürla jagi kü dangi phone süa liasü, anungji ni iba tesemji tonga aodangbo la süchia oor liasü," ta ashi.

Pastor-i, "La temang majung, anungji teyari meshia 911 dangi call süang ta ni ashi. Iba sülen emergency services arua la ambulance ka ajanga UCLA Medical Center-i anir ao," ta metetdaksü.

Federal agents jagi maneni la amongba hospital takdang kima ataa liasü aser sarasademtsütsü atema pastor Torosian nem temelaba-a magütsü.

Department of Homeland Security-ia apuani na apuba osangji shidak ta shiogo. Apuani naji Iran nungertem lir aser tena ozüng alema US nung alir, ta parnoki metetdaksü.

DHS-i social media ajanga, "Tena rongnung kati ajungben medical teyari nüngdaka liasü, anungji agent temi EMS dangi call asüba sülen la hospital-i anir ao. Tangbo tetsürlaji hospital nungi 'discharge' süogo aser tenaprong ERO ket nung lir," ta metetdaksü.

US senso pastor Torosian-i, "Ni agent tem dangji 'tena aputsü atema nenok ket nung 'warrant' ali asü? ta asüngdanga liasü. Parnoki au ta langzü, ajisüaka parnoki kuli kecha mesayu," ta metetdaksü.

Pastor-isa, "Apuani na ket nungji Social Security numbers aser mapa inyaksü atema temelaba agütsüba permits lir, tenati ozüng alema inyaka mali aser küm ka tejaklen nungi tenaprongla ozü Arogo nung adener," ta metetdaksü.

Paisa, "Ozü Arogo nung züngsemtem apubaji tejashitsüka liasü. Ni atema dang masü saka Arogo züngsem ajak atema tejashitsüka lir. Ni Tehran (Iran yimtiba) nung akhidang atalokba ang bilemteta liasü. Parnok taküm sadoksadoka alitsü atema yagi aru," ta ashi.

Torosian-i, Marjan aser la kinüngbu naji Khristan asüba agi Iran toktsür jena aru aser tena yangi Los Angeles nung kinüngertem mali. Tena ya yangi tejenokdak bushirtem lir. Tena ya CBP One inyakyim

ajanga US-i aru," ta metetdaksü.

Iba tatalokba indang video ka social media nung prokshiogo. Video nungji pastor Torosian-i agent tem dang, "Nisung ka aputsü atema nenok paika yagi aru asü? Nenok yagi nisung aika aru. Nenoki osangkakettem nung Iran nung tetsürtem dak atalokba züngshir asü? Parnoki iba tia ajurutsü atema msäü saka sadoksadoka alitsü atema yagi aru," ta ashir.

Pastor-isa agent tem dang, "Parnok den külemi ni-a anir oang. Parnoki ni nüngdaker," ta ashi. Ibaji langzüa agent kati, "Na yangi dang liang aser tatalokbatem reprangang, ajisüaka na onok den külemi arutsü makok," ta ashi.

Pastor-i, "Nenok dak taochi mali. Nenok pei mapa inyaker, ta ni meteta dang lir, ajisüaka nenok dak taaktsü maket. Iba sorkar dak taaktsü maket," ta ashi.

Arogo nung züngsemtem puer aoba sülen Torosian-i Amongnü tekülem sentong thinen aser Arogo nung züngsemtem dang nenok taküm kümzüksü atema Tenla kidangi marui liang ta mepishia metetdaksü.

"Ni parnok menungratsü, ajisüaka ni maneni parnok dak azüittsü, aser parnok matsüngdang maneni sayutsüngitsü imlar," ta pastor-i ashi.

Pastor Torosian-isa, "Ni agent tem dangji tai atoktsü merangdar, ajisüaka sorkar inyaksangshi ajanga ni kanga jashir," ta metetdaksü.

Nicaragua nung Police-i apuba pastor ka kong aliar mejangjar

June 30, 2025: June 19, 2025 nü Nicaragua National Police-i putir Pedro Abelardo Meñdez Peñrez pua liasü, aser tang tashi pa kong aliar mejangjar, ta International Christian Concern (ICC)-i metetdaksü.

Taoba mapangtem nunga Nicaragua nung police-i puer aoba Khristan lenirtem aika

samaogo aser tang tashi kong aliar mejangjar.

Ketdangsertemi ashiba agi, Granada nung Meñdez leniba nung tekülem sentong ka agiba sülen pa den par driver, Luis David Namendi Suárez na meyipa ao. Tenaprong yi agi meseper liasü, ta tai tonglokja police-i apu.

Ajisüaka Meñdez'er lawyer, Martha Patricia Molina-ibo "putir Mendez-i yi kodanga majemer," ta ashi.

Police-i tena puer oaka Nicaraguan Judiciary indang Online Case System nung tena tenüng register süa maliba ajanga ketdangsertem dak melung malemtsüsa akümer.

ANOGO ABEN TSÜNGREM DEN


Tsüngrem taochi koda tulu

"Nai ne tenangzükba ayur kechiaser na temeshi lir" (Neh. 9:8).

Tang na junga lir, saka tanabuba jenjang nung kechi yuja lir, shingai mangu aser memetet. Tsüngrem taochi ajanga asen mera ajakji alir. Pa taochi asen den talubusa aliba ajanga anogo ka nungi ka, küm ka nungi ka ta tepela nung süitemdaksür. Laishibaji asen taküm aser tajungshiba otsü kaket ka lir. Shirnoki ya azünger parnoki Tsüngremji atangji aser ochi ta bushitetter.

Taochi nung jajaba ajanga taküm nung mulung masü aika tepela ken agi melentsür. Terenem akaba bilemtetba ajanga tetsübu aika süshidaksür. Tebilemtetbaji tekalen aliba teimla akümtsü akok. Yashi temoatsü agi tanü tasü itdaksütsü akok. Ibaji tanü mapa nükjidongji lir. Ajanga aruba tashiji aseni tanü amshitsüla; aser Tsüngrem taochi bilemteta asen timtem ajak ken tena süidaksütsüla.

Yi agi tera mesepba agia Tsüngrem den pilatsü: John Piper



June 30, 2025: Pastor aser sayutsüngir, John Piper-i Khristanem dang, talisa tainlonglongpurtem dang yi agi tera mesepba nungia pilaa alitsüla, aser temelungjang tindang agi Tsüngrem den anasa alitsü lenmang shimtsüla, ta ashi.

Pa indang podcast "Ask Pastor John" nung jembidang Bethlehem College & Seminary, Minneapolis, Minnesota nung chancellor, John Piper-i, tasüngdangba aika langzüa liasü.

Tainlonglong lanur Khristan kati, yi agi tera mesepba-a temenen asü?, ta asüngdanga liasü.

"Ni tainlonglong Khristan ka aser ni Tsüngrem den anasatapa alitsü meranger. Ni yi agi tera mesepra ibaji temenen asü? Ni yi agi tera mesepba agibo ni kūsasa azüokteter aser tamajung kecha meinyaker. Ni telemtetba tajung agitsü atema Tsüngrem dang teyari meshia sarasademmer. Ni amataritsüsa mesüra mapa tamajung inyaksüsabobo yi agi mesepa majemer," ta shia yi agi tera mesepba-a temenen asü?, ta

lanur jagi asüngdanga liasü.

Ajioda John Piper-i, iba lanur yagi 'Ni Khristan lanur ka aser Tsüngrem dangi tali anasa aotsü meranger' ta ashir. Ibaji jangratemtsüka lir, kechiyong Laishibai 'Tsüngrem anasa oang, aser Pai na anasa arutsü' (Yakob 4:8) ta ashir," ta metetdaksü.

Efesa 5:18 nung "Aser yi koba nung teratasü lir, aji agi temesep ma, saka Tanela agi sünga liang" Lai o nung ajemdaker pai saaksalema alitsü, kümdanga alitsü aser shisa makabatem ama masü shisa kaa alitsü, iba denji külemi Kibubai melungba angatettsü metetdaksü.

Paisa yi ajemba ajanga gari lendong ajuruba, mapa nungi jendokba aser kibongtem raksaba atishia metetdaksü.

John Piper-isa, "Nai atangji Tsüngrem anasa onüra nü yimayimpong asadanga nai temenen matsüngdang koba tashi aotsüla, ta masüngdangtsüla," ta ashi.

Yi agi tera mesepbabo temenen masü asü? ta asüngdangji 'Ni tera anünüba agibo gari aniyonga kecha masü südi?' ta asüngdangba den saku lir, ta paisa shisem.

AO OSHI ANGAZÜKDAK:**TANÜ ANGAZÜKTSÜBA OJANG****Tepokpok**

(n) tango sashidaktsüba temang shilem (lungs)

* Moko achiba agi tepokpok nem timtem agütsür.

Tepokrep

(v) Gari tsüing mesüra ball ama osettem raksaba (deflated, burst)

* Gari tetsüing tepokrep asüba agi onok mouteti anen.



Tir Yimyim

OLONG PAITEP # 7196

	1				2			3		4
5								6		
7			8							
								9		
		10								
11										12
					13					
					14					
15										

TIPIEN

1. Balaka

- (5)

6. Aika shirangba

- (4)

7. Tar tatsü

- (6)

9. Nenü'er jabaso

- (4)

10. Sen latettsüba

- (7)

11. Tangar kübok alir

- (4)

14. Lon nung inokba

- (6)

15. Tzü ayimdak

- (4)

16. Ajok

- (5)

LANGTSÜNGLEN

2. Hai sür inyak

- (4)

3. Aor tenüing ka

- (6)

4. Ali telungi talangka lur

- (5)

5. Tebang kenyonki mazüoker

- (4)

8. Ken atema anenzükertem

- (5)

9. Toktepa noktak

- (5)

10. Sen

- (6)

11. Benjong agi

- (5)

12. Telung nung rizünga ayu

- (4)

13. Tebang nung enok

- (4)

OLONG PAITEP # 7195 TELANGZÜBA**TIPIEN :**

1. Aben, 4. Artsü, 7. Lisem, 8. Liwa,

9. Sarasadem, 12. Aket,

14. Mangu, 15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar,

6. Belem, 9. Süjak, 10. Aonung,

11. Dokan, 13. Tinu.

NAI-A YA METETTER MA

Kensington Oval, Barbados nung Travis Head-i West Indies den Test asaya mezüingbuba innings nung run 59 aser tanabuba innings nung run 61 yanglua Player of the Match award anguba sülen pa ya WTC nung POTM awards 10 anguba mezüingbuba asayar küma otsü tasen ka yanglyuogo. Head-i tang tashi nung WTC asaya 50 asayar lir aser iba mapang pai run 3196 yanglyuogo. Pai WTC nung mezüingbuba POTM award ya New Zealand den 2019 küm Melbourne Cricket Ground nung asayaba mapang ngua liasü.

Assam nung sorkar ali atsünger aliba bigha 450 dak tema azüngtetogo

Guwahati, Aami/June 30 (Agencies): Assam sorkari tang sorkar ali atsünga alibatem azüngtettsüyonga aoba nung shilem ka ama Barkhetri constituency kübok Bakrikuchi yimtsüing nung Nalbari district administration-i Hombarnü ali bigha 450 dak tema azüngtetogo.

Ketdangsürtemi Uttar Barkhetri Mouza indang Dag No. 106 nung ali bigha 452, katha1 aser lechas 14 dak rangloker iba sentong ya benoka inyaka liasü. Bulldozer aser machine tulu amshia iba team yagi iba tesem nung alirtemi ali bigha 82 nung kiojen balala

yanglur aliba raksaja liasü.

Iba inyakyim benoka inyakba mapang kecha mepetmesü matoktsü atema ketdangsürtemi police aika yoka liasü. Timtem lendong ataloktsü aliba nungi jenboa alitsü atema security forces tem anogo tepeyong kümküma liasü.

Ali azüngteta arutsüba jangja akümba sülen kibong aikati Deobarnü parnok mulungka nung parnok ki bena liasü. Hombarnü tashi nungbo iba tesem nung alirtem timba parnok aliba tesem anasa tang tesemtemi belener or liasü, ta ketdangsürtemi ashi.

Sorkari raksatsüba kiojentem rongnung sorkar primary school ka aser mosque ka densema liasü, aser iba ajanga nüburtemi tarutsü nung education aser tamangba yimsü dak sendakba nung nüburtem libaliro nung kongshitsü akok ta shisabulua bilemer.

Ozüng alema sorkar ali atsünga alibatem meyipa agiba nung iba inyakyim ya-a shilem ka liasü. Ibala mesükba inyakyimtem tawa district aika nung benoka inyakyonga arudar, kechiyong sorkari official aser lokti amshitsü atema sorkar ali meyipa agitsü meranga arudar.

Manipur MP A. Bimol pa indang constituency-i meyoki nokdanga ayu

Imphal, Aami/June 30 (Agencies): Inner Manipur MP A. Bimol Akoijam-i, pa Bishnupur district kübok Phougakchou-Ikhai Makha Leikai Keithel (Bazar) tesemi meyokba atema Deobarnü security forces aitsüogo. Iba tesem ya pa indang constituency nung shilem ka lir.

X nung post ka ajanga Akoijam-i ashiba agi, ketdangsürtemi pa sota ayu saka Pangals (Muslims) densema tanga kintem nungi nüburtem kasa tesemi sadem sadema danga yoka liasü.

"Ni Lok Sabha züingsem ka lir, saka ni kü indang constituency nung shilem ka semdangtsü memelai nokdang, ajisüaka kü nükdang tangartembo menokdangi

**A. Bimol Akoijam**

senzüdakja liasü," ta pai zülutsü.

Iba ya bendanga amshiba temaitsüka ta shi Akoijam-i, ozüing alema buffer zone ka benokba atema state aitsü aser ashiba agi, iba ajanga Manipur nung kin o kin tsüingda tebendang tali adokdaksür.

Paisa, sorkari security dak atemer telemdang adokdaksütsü atema inyakdar ta ashiba den iba amala policy yagi state nung tang mepetmesü adoker aliba tamajungba kümdaktsütsü.

"Teyazü jembia mesüra pei ajungtsü bilema inyakba agi masü saka ochishia aser temulungtetba tulu nung inyak nungdang iba ken o ya bentettetsü," ta pai ashiba den, Ato Kilonser indang Office, Union Home Ministry aser Congress lenirtem tag süja liasü.

Manipur nung senzüsenpong nung tenokdangba agütsüba aser militarized zone tem amenoker inyaksangshiba atema süoki ia bilemba mapang ka nung Akoijam-i iba olen ya lemsatepogo.

Assam nung NSCN (K) züingsem ka apu

Guwahati, Aami/June 30 (Agencies): Military Intelligence (Kolkata) nungi osang tejangja angazükba sülen security forces-i NSCN (K) Nikki Sumi faction züingsem ka puogo. Pa ya lenmang ajanga Dimapur-i jena aotsü meranga aliba mapang apu.

Osang tejangja angazükba sülen takaratiba nung jenjang agia, Assam nung Jorhat Police-i teyari agüja 44 Assam Rifles (Khonsa) aser Arunachal Pradesh Police, nati meita aoba

sentong ka ayongzüka agi. Meita aoba mapang parnoki Jorhat district kübok Teok nung telungpursang ya sota liasü.

Ken o ashishiba mapang iba nisungba yagi Arunachal Pradesh kübok Tirap district nung prangbong injang aser hadir balala miima aliba indang metetdaksü.

Iba osang dak ajemdaker sepaitem yagi iba tesem meita ao aser prangbong injang aika nguteta liasü, koba rakzükrakdemsü atema amshir

asütsü ta temulung melemer bilemer.

Ketdangsürtemi ashiba agi, iba ajanga NE nung telungpurtem inyakyim nung takoksa tulu adokdaksüogo. Prangbong injang aika ngutetba dak sendakba nung ken o bushisüingdang tenzükogo.

Security agency temi iba telungpur apuba aser prangbong injang aika ngutetba ya Northeast nung telungpurtem anema jenjang agiba mapang takok tulu ka lir, ta ashi.

GOVERNMENT OF NAGALAND
DIRECTORATE OF HIGHER EDUCATION
NAGALAND: KOHIMA

URGENT

Website: www.highereducation.nagaland.gov.in Email: dir.highedu@gmail.com
NO.HED/SCHO/MERIT-R/2023-24/846 Kohima, dated the 30th June 2025

INFORMATION ON PAYMENT OF STATE MERIT & RESEARCH SCHOLARSHIP FOR THE ACADEMIC YEAR 2024-2025.

It is hereby informed to all the beneficiaries of the State Merit & Research Scholarship that the payment for the **Academic Year 2024-25** has been carried out for **3223 beneficiaries (3128 Merit students and 95 Research scholars)**. The beneficiary list is available at the Directorate's website (www.highereducation.nagaland.gov.in). The students whose names are on the beneficiary list but have not received their scholarships due to dormant/invalid/inactive bank accounts can send their active bank details through the given link/QR code till **31st July 2025** from the date of this publication.



Sd/-
(Dr. NISHENA NEKHA)
Addl. Director
Higher Education
Nagaland: Kohima

Molungnen O



Wb. S. Ali Longkumer (Kelingmen)
15.05.1959 - 24.06.2025

Aseni teti meima aliba tebudeti lenir tajung **Asür Supongliba Longkümer** (Kelingmen village) shirangba anogo nungi tenzüka pa akümüli wadang atemba anogo tashi nung kija, kibong aser lokti balala ajanga nüpo,shisatsü aser sarasadem den rongsen tulu agi yariba asoshi ajak dang pelaba lemsateper. Aji oda, nenok ajak dang tsüngdong arua melemsateptet nung iba osang kaketa ajanga ajak dangi pelaba lemsateper, Tsüngremi nenok ajak moajangta ozü tamang sarasadem.

~ Temeim Kinungtsü, Chirnurtem aser Kinungertem.

UNION PUBLIC SERVICE COMMISSION TATIDANG /
RECRUITMENT TESTS (RTS) - 2026 SENTONGTEM

Sl. No.	Name of Examination	Date of Notification	Last Date for receipt of Applications	Date of commencement of Exam	Duration of Exam
1.	Reserved for UPSC RT/ Examination			10.01.2026 (Saturday)	2 Days
2.	Reserved for UPSC Examination			17.01.2026 (Saturday)	2 Days
3.	Combined Geo-Scientist (Preliminary) Examination, 2026	03.09.2025	23.09.2025	08.02.2026 (Sunday)	1 DAY
4.	Engineering Services (Preliminary) Examination, 2026	17.09.2025	07.10.2025	08.02.2026 (Sunday)	1 DAY
5.	CBI (DSP) LDCE	24.12.2025	13.01.2026	28.02.2026 (Saturday)	2 DAY
6.	CISF AC(EXE) LDCE-2026	03.12.2025	23.12.2025	08.03.2026 (Sunday)	1 DAY
7.	N.D.A. & N.A. Examination (I), 2026	10.12.2025	30.12.2025	12.04.2026 (Sunday)	1 DAY
8.	C.D.S. Examination (I), 2026				
9.	Civil Services (Preliminary) Examination, 2026	14.01.2026	03.02.2026	24.05.2026 (Sunday)	1 DAY
10.	Indian Forest Service (Preliminary) Examination, 2026 through CS(P) Examination 2026				
11.	Reserved for UPSC RT/ Examination			06.06.2026 (Saturday)	2 DAYS
12.	I.E.S./I.S.S. Examination, 2026	11.02.2026	03.03.2026	19.06.2026 (Friday)	3 DAYS
13.	Combined Geo-Scientist (Main) Examination, 2026			20.06.2026 (Saturday)	2 DAYS
14.	Engineering Services (Main) Examination, 2026			21.06.2026 (Sunday)	1 DAY
15.	Reserved for UPSC RT/ Examination			04.07.2026 (Saturday)	2 DAYS
16.	Central Armed Police Forces (ACs) Examination, 2026	18.02.2026	10.03.2026	19.07.2026 (Sunday)	1 DAY
17.	Combined Medical Services Examination, 2026	11.03.2026	31.03.2026	02.08.2026 (Sunday)	1 DAY
18.	Reserved for UPSC Examination			08.08.2026 (Saturday)	2 DAYS
19.	Civil Services (Main) Examination, 2026			21.08.2026 (Friday)	5 DAYS
20.	N.D.A. & N.A. Examination (II), 2026	20.05.2026	09.06.2026	13.09.2026 (Sunday)	1 DAY
21.	C.D.S. Examination (II), 2026				
22.	Reserved for UPSC RT/ Examination			26.09.2026 (Saturday)	2 DAYS
23.	Reserved for UPSC RT/ Examination			10.10.2026 (Saturday)	2 DAYS
24.	Reserved for UPSC RT/ Examination			31.10.2026 (Saturday)	2 DAYS
25.	Indian Forest Service (Main) Examination, 2026			22.11.2026 (Sunday)	7 DAYS
26.	S.O./Steno (GD-B/GD-I) LDCE	16.09.2026	06.10.2026	12.12.2026 (Saturday)	2 DAYS
27.	Reserved for UPSC RT/ Examination			19.12.2026 (Saturday)	2 DAYS

Temetettsü : Nüngdak süra Examination/RTs sangdong anogo, tenzükba aser mapang melenshitsü akok.

CBC - 55101/14/0002/2526



OFFICE OF THE
AKHOYA STUDENTS' UNION
P.O. Changtongya Town, Pin-798613
District : Mokochung, Nagaland

TENÜNGSANG AGÜTSÜR

Nagaland Staff Selection Board (NSSB), Clerical & Allied Service Examination (CASE)-2024 tatidang agiba nung "Akhoya Shisaluyimer Telongjem" züngsem nungi Wb.Wapang Imsong aser Wt.C.Rongsenrenla Imchen na jala Kr.Tiyongnaro Imsong-i LDA Cum computer Assistant (Work's &Housing NPWD) nung takok tulu ngua Shisaluyimer Telongjem nem tang masü saka Yimer Yimsanger ajak nem konang nüngsang tulu bener arutsü nung kanga-sa pelaba den tenüngsang tulu agütsür. Tarutsü anogo-tem nunga ne sempet aser mapa tajung ajanga maneni tenüng tajung aser takok ngutettsü asoshi asen "Akhoya Shisaluyimer Telongjem" Sarasadem.

Shisaluyimer Wadang nung,

Sd/-
Sb. Wapangtoshi K Jamir
Tir
Akhoya Shisaluyimer Telongjem

Sd/-
Kr. Asenla Imti)
Tongti Zülur
Akhoya Shisaluyimer Telongjem

Israel-i asendenshir Gaza amak; nisung 38 tepset

Cairo, Aami/June 30 apokba dang angashir." **(Agencies):** Trump Israel indang tank tem Gaza administration-i ceasefire tasen City kübok Zeitoun suburb-i oa ka atema benokba sensaksemtsü aser north nung tesem aika nung asoshi Israel nunger bomb pokloktsü aser kasa ketdangsürtem aotsü lia, mapang nung school tem nung Hombarnü Israel military-i tesem jenoka alirtem dang ainshitsü balala azüngtettsüsü tetuyuba tetuyuba agütsüba sülen tayimtsütemi school pezü nung agütsüba sülen northern Gaza bomb poklokja liasü, ta iba tesem kanga sashia makogo. nung alirtemi ashi.

US tir Donald Trump-i, ita 20 Hombarnü Israel-i tesem rara aliba rara ya tembangtsü balala amakba sülen nisung 38 atema mepeshiba sülen anogo tepsetogo ta health ka lir Ato Kilonser Benjamin ketdangsürtemi metetdaksü. Netanyahu den kanga junga Aüsrtem rongnung Zeitoun sendaktepa aliba lenir kati Gaza nungi 10 aser Gaza City nungi nung ceasefire, Iran ken o aser 13 densema liasü. Medic temi tanga diplomatic tesendaktep ashiba agi asür 13 rongnung balala asoshi sensaksemtsü parnok timbaka prangbong agi atema White House alirtemi anüng ajanga-a iba semdangtsü imlar. tesem maka liasü ta ashi.

Ajisüaka Gaza nungbo Rara tenzüker tang tashi nüburtem asoshi kecha nung Israel nunger sepaitemi anisüngzük mali. "Bomb apokba nung Gaza nung Palestine nunger khien danga manen. Parnoki 56,000 dak tema tepsetogo aser school aser kitem nung bomb asürtem ya timba civilian tem lir. pokloktsü. Menoknok anoker Gaze ya shilem 80 bo joko ama liasü," ta Gaza City nung Israel nunger military alir Salah-i ashi. "News nungbo tawabangba kübok lir, ta United onoki ceasefire yakta benoktsü Nations-i metetdaksü. ta angashir, saka idakibo onoki tasüba dang angur aser bomb



Under-15 Boys aser Under-17 Girls atema Nagaland State-Level Pre-Subroto Tournament 2025 Hombarnü tenzükogo. Tebur team pezü ya Government High School Bongolon Peren, Christian School Molvon Chumoukedima, SFS Higher Secondary School Chumokedima aser Lady Bird School Mokochung lir. Tetsür team asem ya Government High School Meriema Kohima, Chrstian School Molvon Chumoukedima aser Government Middle School L. Khel Kohima.

Hockey Asia Cup nung Pakistan masayadaksütsü akok

Aami/June 30, 2025

(Agencies): India nung tebur Asia Cup asayatsü aliba nung Pakistan asayatetsü masayatetsü mejangja, kechiyong kiralongrartemi Pahalgam amakba aser Operation Sindoor sülen parnok masayadaksütsü takhangba tali kümder.

Hockey India ketdangsür kati ashiba agi, sorkar den sensaksem tang tesüdak lir aser tatembangbuba telemtetba ka tang tashi magütsü lir.

Men's Asia Cup 2025 ya Bihar kübok Rajgir yimti nung August 29 nungi September 9 tashi Rajgir Hockey Stadium nung asayatsü.

Tawa kiralongrartemi Pahalgam maka nisung 26 tashi tepsetba sülen iba asayamung

nung Pakistan shilem agitsüba jenjang mejungi kümogo. Asayamung asayatsü ita ana dak tajemba anunga lia tang tashi Pakistan team nem sorkari temelaba magütsü lir.

"Onoki sorkar den tongtepratepda aser parnoki kechi tetuyuba agütsüdir iba sülen anidaksü. Tang tensa apira Pakistan team shilem agitsü memelatsü ama bilemer," ta Hockey India ketdangsür yagi IANS dang ashi.

Tebur Asia Cup 2025 ya Belgium aser Netherlands nung asayatsü aliba 2026 FIH Men's Hockey World Cup atema qualifying asayamung ka asütsü. Iba asayamung akokba team World Cup nung asayatsü maongka angütsü.

Kasa mapang nung India-isa

FIH Hockey Men's Junior World Cup 2025 Chennai aser Madurai nung November 28 nungi December 10 tashi ayongzüka asayatsü. Iba junior asayamung nunga Pakistan team asayatetsü masayatetsü mejangja, kechiyong Pahalgam amakba sülen parnok masayadaksütsü takhangba tali kümogo. Iba asayamung nung parnok India den telok kasa nung atar lir

Pakistan tebur hockey team-i 2023 küm tatemsa Chennai, Tamil Nadu nung Asian Champions Trophy atema India semdangogo. Iba asayamung nung Harmanpreet Singh-i aniba India team-i final nung Malaysia goal 4-3 agi koka iba asayamung otsüsüsüsa pezübenbuba akok.

Azhar Mahmood Pakistan Test team 'acting' head coach kümogo



Azhar Mahmood

Aami/June 30, 2025

(Agencies): Taoba mapang Pakistan nung all-rounder Azhar Mahmood, Pakistan Test team acting head coach kümogo. Pai iba mapa ya Jason Gillespie aser Gary Kirsten na nungi agizükogo.

Pakistan Cricket Board-i, Mahmood nem iba mapang agütsüba indang sangdongogo, shiba 2022 küm April ita nungi format balala indang assistant coach inyaka arudar. Arishi küm 50 tain Mahmood-i taoba küm Australia nung coach Gillespie den Test atema aser

South Africa nung Kirsten den limited-overs cricket atema küm ana asoshi tenangzüktepba yanglua liasü. Gillespie aser Kirsten napronglai mapa toktsüogo.

"Pakistan tebur team acting red-ball head coach asütsü Azhar Mahmood shimba Pakistan Cricket Board-i tanü sangdonger. Azhar-i iba mapang ya pai tang tenangzüktepba yanglur aliba metembang tashi bena atatsü," ta PCB-i metetdaksü.

"Azhar Mahmood-i tajangshiba aika bener iba mapa

agizüker. National team assistant head coach ama inyakba sülen Azhar ya team nung tongtibang shilem agir ka lir. Pai asaya kanga junga angatetba den international jenjang nung tajangshiba peria bener aliba aser English county circuit nung takok tajung ngua inyakba sülen pa ya iba mapa atema kanga tapet lir," ta board-isa shisem.

PCB-isa, English county cricket nungi Mahmood-i kanga takok ngua inyakba aser talisa assistant coach ama inyakba mapang Surrey-i County Championship akokba indang lemsatet.

"Pai County Championship titles ana abenba ajanga red ball asaya nung pa inyakyim sayur, aser iba ajanga pa lenisüba, tasatem aser temaba jenjang tongtettsü atema bendanga agütsür aliba sayur," ta PCB-isa metetdaksü.

"Azhar lenisüba nung red-ball team maneni tejakleni renloka oa temaba jenjang nung tajungtiba asayatsü ta PCB-i tamang akar," ta board-i ashi.

Mahmood 1996 nungi 2007 tashi asaya aliba mapang Pakistan team nungi Test 21 aser ODI 143 nung asayaogo.

Chelsea-i Joao Pedro atema £60m agütsütsü mulunga agizükogo

Aami/June 30, 2025

(Agencies): Chelsea-i Brighton indang forward Joao Pedro alizüktsü atema pound million 60 agütsütsü mulunga agizükogo.

Arishi küm 23 tain asayar yagi küm tenet atema tenangzüktepba ka yanglutsü imlar aser pa Fifa Club World Cup nunga asayatsü akok.

Joao Pedro ya medical tetendangba agitsü atema Brazil nungi United States-i aotsü aser pa Hokolbarnü Philadelphia nung Palmeiras (BST 02:00) den quarter-final asaya nung asayatsü akok.

Newcastle puria iba asayar alizüktsü atema tejangraba liasü aser Brighton den sensaksema aruogo, ajisüaka osang ajanga ashiba agi, Brighton-i Premier League club ana tashi-i iba asayar atema bid asüba magizükba sülen tang Chelsea den Pedro atema pound million 55 aser add-ons pound million 5 atema mulungtepogo.

Chelsea-i Benfica koka Club World Cup quarterfinal-i aiba sülen ghonda ishika dang lir Borussia Dortmund den England nung winger Jamie Gittens pound million 55 agi alizüktsü atema mulungtepba sülen tang iba jenjang ya agiogo.

Ajisüaka arishi küm 20 tain Gittens ya iba asayamung nung Enzo Maresca-i aniba team nungi shilem magitetsü, kechiyong pa Dortmund nungi asayatokogo.

Joao Pedro-i Brighton nungi season ana asayaba mapang asaya 70 nung nung goal 30 idaksüba den assist 10 sütsüba sülen tang Chelsea nung denogo. Pa ya 2023 küm Watford nungi otsüsüsüsa pound million 30 agi alizüka liasü.

Seagulls manager Fabian Hurzeler-i tilateri ken o kar aliba ajanga pa Premier League nung tatembangbuba asaya Tottenham den asayaba mapang masayadaksü.

Ayush Shetty-i US Open tebur kija asaya kokogo



Aami/June 30, 2025

(Agencies): India nung lanur badminton asayar Ayush Shetty-i US Open Super 300 tebur kija asaya final nung Canada nung Brian Yang straight games nung akokba sülen tang mezüngbuba BWF World Tour title ka benogo.

Arishi küm 20 tain asayar ya 2023 junior world championships bronze medallist lir, aser pai Deobarnü final nung third-seeded asayar Yang 21-18, 21-13 agi koka liasü. Tena tsüingda minute 47 asaya. Ayush-i hopta tepeyong kanga junga asayaogo, kong semifinals nung top seed Chou Tien Chen akokba densema lir.

Iba asaya akokba sülen Shetty-i tang agi tasembenbuba Yang kokogo. Pai taküm Malaysia aser Taipei Open nunga Yang koker liasü.

Tetsür kija asaya final nung nung arishi küm 16 tain India tsür Tanvi Sharma-i kanga meranga asaya saka United States tsür top seed Beiwen Zhang mekoki tanabuba jenjang nung tembangogo.

World Tour final mezüngbuba nung asayaba

mapang Tanvi-i 11-21, 21-16, 10-21 agi asaya mekoki liasü. Tena tsüingda minute 46 asaya.

Tebur kija asaya final ya asayar anapronglai kasasa dang asayateta tenzük aser 6-6 ta point kasasa liasü, saka iba sülen Shetty-i point 5 atonga ngua interval tashi nung point 11-6 agi pa tejakdang liasü.

Yang-i meranga asaya tur pa 13-11 agi tejakdang aküm saka tatsüka dang lir 16-16 ta kasasa aküm. Iba sülen Shetty-i mezüngbuba game ya amokbanger asaya-a asaya kokatok.

Tanabuba game nung Mangalore nungi asayar ya yakta dang 7-2 agi tejakdang aküm aser Yang nem pa ajateta metyudaksüi maneni asaya.

17-12 agi Shetty tejakdang aküm saka sülen Yang nem point ka dang ngudaksü aser pai tanabuba game-a koka tang mezüngbuba World Tour title ka benogo.

Shetty-i taoba mapang 2023 küm Odisha Masters Super 100 tournament final aser 2023 Bahrain International aser 2024 Dutch Open nunga final tonga asayaogo.

BILEMDANGANG

"Oset tila ka dang süaka mapang talangka mintoki benra mekoki akümer."